

## PRIMERO LO DE TOES Y TOOS

### *En defensa de la Escuela Pública*

Estos días vien debatiéndose en Congresu de los Diputaos la futura Llei Orgánica d'Educación (LOE). Ye esta una Llei na que'l debate públicu ta tracamundiáu dafechu. Pese a lo que munches y muchos pudieren camentase, **el proyectu de LOE contién dalgunos de los elementos más retrucaos** pola comunidá educativa y el conxuntu de fuerces progresistes **de l'antecesora, la LOCE**.

Efectivamente, la LOE permite la **estensión indiscriminada de los conciertos** n'educación infantil y otres etapes non obligatorias avanzando nel procesu de privatización del enseñu, procesu privatizador que s'allarga más allá del Bachilleratu y la Formación Profesional, llegando a la universidá; **caltién l'enseñu de les relixones** nes escuelas y institutos permitiendo l'adoctrinamientu relixosu y la perda de cientos d'hores, dende los 3 hasta los 18 años, del alumnáu que nun opta pola relixón (más del 50 % en Bachilleratu) y del profesoráu que tien que-yos atender, y ello por más que'l Conseyu Escolar del Estáu demandare que la relixón nun faiga parte del curriculum y que se denuncien los alcuerdos preconstitucionales col estáu Vaticano; afonda na **xerarquización** de los centros educativos y **torga la eleición de les direcciones** pola comunidá educativa; apregona l'atención a la diversidá, pero **nun amenorga'l númberu d'alumnos por aula** (pelo contrario, increméntalo) magar de los enormes cambeos sociales producíos nos últimos años, a les característiques del alumnáu actual, enforma más diverso, y a los nuevos retos a los que, en consecuencia, ta enfrentándose'l profesoráu; nun garantiza un financiamientu abondo: acabáu'l periodu d'implantación nel añu 2010, **el porcentaxe d'inversión n'educación respective al PIB va seguir tando per baxo de la media europea**. Estes yeren dalgunes de les razones poles que refugábemos la LOCE y que la LOE caltién.

Pero, a pesar de toles concesiones presentes nel proyectu de Llei, la derecha política, la más reaccionaria dende la transición, y la xerarquía católica más ultramontana y voraz de los últimos años amuéstrense insaciables nes sos esixencies. Al traviés d'una llarga campaña, insidiosa y enllena de mentires, fixeren creer a una bona parte de la población que la LOE ye una Llei destinada a acabar col enseñu de la relixón, colos centros concertaos y cola llibertá de les persones. ¡Nada menos!

Ye inalmisible qu'una institución, la Ilesia Católica, que gocia equí de privilexos únicos en mundu, pretenda erixise en poder lexislativu y dictar les polítiques educatives del Estáu. Convién recordar qu'ésti aporta xenerosamente, añu tres añu, el financiamientu riquío pola Ilesia católica y non llograda a traviés de la recaldación del IRPF, a razón d'unos 35 a 40 millones d'euros per añu, pese a que dende 1979 la Ilesia se comprometió al progresivu

autofinanciamentu; pero ye que, amás, percibe 4.000 millones d'euros al año pal financiamientu de los centros educativos privaos, más otros 517 millones pa pagar a los 15.000 "catequistes" nomaos pola llesia p'adoctrinar nel so nome; por nun falar de les exenciones fiscales de les que gocia n'exclusiva: exención del IVA, del IBI, de los impuestos reales o de productu, sobre la renta y sobre'l padremuñu, exención d'impuestos sobre Sucesiones y Donaciones y Tresmisiones Patrimoniales, tamién tán exentes d'impuestos les donaciones que recibe, etc.

D'igual manera, el llamáu "llabor social de la llesia", ta ampliamente financiáu a traviés de subvenciones de toa mena: municipales, autonómiques, estatales, ayudes a ONGs como Cáritas, Manos Unidas y otres. Per otra parte, **la llibertá de lo que falen ye la llibertá pa crear centros privaos y que depués los financie l'Estáu, la llibertá pa escoyer l'alumnáu, la llibertá pa poder seguir cobrando a les families** aumentando la discriminación. En Degaña, n'l bias y en tantos y tantos conceyos rurales esi "llabor social" amentáu relluma pola so ausencia: nun ye rentable, nun hai negociu. Concéntrense nes comunidaes más riques y nos grandes núcleos urbanos.

Ye igualmente inalmisible que la cúpula dirixente del Partido Popular qu'aprobó una llei, la LOCE, ensin consultar absolutamente con naide, que redució'l financiamientu públicu nos años que tuvo nel poder, que potenció l'enseñu privao llegando a concertar centros que segreguen al alumnáu por mor del sexu, que pretendió imponer l'enseñu de la relixón católica a tol mundu (col silenciu cómpliz de la llesia), fale agora de la necesidá d'un pautu. Ye precisu un pautu, sí, pero **un pautu social pola educación pública que sitúe a ésta como exa vertebradora del sistema d'enseñu**, tal y como proponía'l PSOE nel programa electoral que-y llevó al poder.

Ye por too ello que les organizaciones convocantes, **Izquierda Unida (IU), Bloque por Asturias (BA), Izquierda Asturiana (IAS), Comisiones Obreres (CC.OO), el Sindicatu Unitariu y Autónomu de Trabayadores de la Enseñanza d'Asturies (SUATEA), la Corriente Sindical de Izquierdas (CSI), el Sindicatu de Estudiantes (SE), Confederación General de Trabaxadores (CGT), la Confederación de Asociaciones de Padres de Alumnos (COAPA), las Juventudes Comunistas de Asturias (JCA), l'Asociación de Estudiantes Aula Joven y el Movimientu Social en Defensa de la Escuela Pública de Asturias (MSEPA)**, esiximos al gobiernu que nun ceda a les mentires y los xantaxes del nuevu nacional-catolicismu que representen les cúpules del Partido Popular y de la xerarquía católica; que s'afite na base social que-y llevó al poder y qu'inxerte nel procesu del debate del proyectu les enmiendes amañoses pa que la Llei Orgánica d'Educación contemple les midies que vienen darréu:

- **La declaración explícita del enseñu públicu como exa vertebradora del sistema educativu.**

- Una **Llei de Financiamientu** que compense la ruina y decreciente inversión n'educación pública padecida nos años de gobiernu popular y que garantice un **enseñu públicu de calidá**.
- Un enseñu que dote de **saberes que permitan conocer la realidá**, y de valores qu'afalen a **tresformala en beneficiu del bien común**. L'enseñu de **les relixones nun ha de tar presente nel curriculum** escolar.
- Un **descensu xeneralizáu de les ratios** pa favorecer una auténtica atención a la diversidá.
- La **compensación de desigualdaes y l'ausencia de toa mena de discriminación**.
- **Servicios complementarios públicos** (comedor, tresporte, actividaes deportives, culturales, artístiques, etc.) pa favorecer, de manera efectiva, la **igualdá d'oportunidaes**.
- El **funcionamientu democráticu** de lo centros: elección de les direcciones per parte de la comunidá educativa; participación democrática de tolos estamentos (families, alumnáu, profesoráu) na toma de decisiones.

Namái dende una escuela pública vertebradora del sistema educativu, namái dende una escuela pública considerada como exa prioritaria de les polítiques educatives pue lluchase, nel terrén educativu, por una sociedá más xusta, solidaria y pacífica.

Por toes estes razones, les organizaciones anteriormente reseñaes convocamos a tola ciudadanía a una **MANIFESTACIÓN EN DEFENSA DE LA ESCUELA PÚBLICA el próximu miércoles, 14 d'avientu, a les 18.00 h. na Estación de RENFE n'Uviéu.**

Porque lo primero ye lo primero:

***Primero lo de Toes y Toos***

***En Defensa de la Escuela Pública***

***Por una Escuela Democrática, Plural, Integradora y Llaica.***

**Llucha pol Bien Común. Defendi la Escuela Pública. Acudi a la Manifestación**

